

Vnnd sihe habenn gesaget, das vonn alders briff vnd segel enen vnnd eren vorforenn gegeben werenn, das man nicht mehr nehmen soulede eyn dy Wage, dann von j. ß steyne i. gr. (24/6 24)

S. M. L.

45. Tvchmechernn. Anno etc. lxxv^o. Ist gantz fil handels gescheen mit den Tuchmachern, vnnd mit enen hartlich gehandelt. So das sihe denn freyen Wollenmargkt zcu gesaget habenn, do eyn nicht zcu haldenn gein Bürgern vnd Gestenn, ouch denn nicht sterckenn auff dy schur.

Vnnd der freye Wollenmargkt ist so awssgeruffen eodem anno, am Donnerstage nach Visitationis Mariae. (6/7 24)

Item vor alders haben sihe vff deme Hantwercke nur v. bussen gehabt.

Dy erste, der gestolne war gekaufft hatt.

Dy ander, der zcu schmal scheret.

Dy dritte, Wer uff zcweien gezcawen lesset wirckenn.

Dy virde, wer nicht eyn recht wagk gibt denn weitgestin.

Vnd dy fünffte, Weme nicht der knecht ausslernet.

Vnnd ist mit enen geredet, wy sihe darober fil newe bussen machen, vnnd nehmen do von nicht geldt, Sunder slohen das in eyne feyer. Vnd sihe haben gelobt das abezcuthun.

Item sie haben gelobet, das sihe vnnsere Mitbürger, so dy widder das hantwerg thun, nicht besenden wellen, Sunder das dem Rathe clagenn. Werde jmant wider jr hantwerg thun, das solde der Rath erkennen.

Von dem eynschütten ist en gesagt, das sihe sollen lassen glich Innschütten, dem armen als dem reichenn, dem reichenn als dem armen.

Sunder vmb das Tuchmachenn haben sihe gelobet, sihe wollen sich do mitte bekommern, vnnd uff Weisse vnnd wege gedencken, das das hantwerg nicht zu nichte werde. Vnnd habenn dorzcu frist gebeten biss nach Michaelis eodem anno vtsupra.

Eodem anno haben dy gemeynen Tuchmacher eynen briff geschriebenn an magistrum Johannem Frawenburg dy zzeit Bürgermeister. Vnnd dor inne fil gebrechenn vorzcalt: Wy sihe von denn geswornen belestiget wordenn. Vnnd gebettenn, man wolde sihe dor Inn versorgen.

46. Anno etc. lxxv^o. sein die Graben vmb dy forstadt gemacht, vnnd der zawmen ist dorumb gefurt vnd gecleibet.

Anno eodem hat der Zirkelmeister newe vnnd alt gewandt, Item Hütte vnd Leynwadt geferbet vnnd geblecket mit rynnnden. Ist em vom Rathe irkannt, er moge alleyne Hütte vnd Leynwadt blecken. Sunder mit allem wollenn dinge, ess sey alt adder new sol er vnverworren sein, vnnd sol em noch keinem andern nicht verhangen werdenn.

Anno eodem ist das alde Huss by vnnsere lieben Frawen thor gebrochen, uff Priuilegium vom Konige Mathia doruff gegeben.

Lit. Georgij vom Steine dat. 30. Nouembr 1474. De facto structuræ apud Portas vestras etc. regia M. in istis